

REGIONAL NEWS

HEADLINES:-

1. Nilaini hian chief executive member Pu C. Lalmuanthanga kaihhruai LADC-a Congress leh MNF sorkar intawm fiah a ni dawn.
2. Aizawl Civil Hospital-ah kal thlak (renal transplant) ti ve thei turin ruahman mek a ni.
3. Delhi Lt. Governor-in Delhi Assembly 7-na a thiah hnuah Chief Minister Atishi-i'n Lt. Governor hnenah banna a thehlut.
4. Chhattisgarh-a Maoist leh security force-te inbeihna thleng mekah Maoist 30 chuang an thi tawh.

<><><>

LADC POLITICS

Lai autonomous district council (LADC)-ah ZPM-in sorkar ding lai lehthal thei dawn a a lan avangin tunkar Nilaini hian chief executive member Pu C. Lalmuanthanga kaihhruai Congress leh MNF sorkar intawm chu thlawptu a ngah tawm em tih fiah a ni dawn.

Larsap Gen. Vijay Kumar Singh remtihna-in district council & minority affairs department secretary Pi Sangchhin Chinzah chuan LADC chairman Pu V.L. Hmuaka hnenah lehkhaw thawnin Nilaini, February ni 12 khian sorkar dinglai buk tura LADC inkhawm hmanhmawh ko turin a ngen a ,sorkar dinglai buk a nih hma chuan sorkar hnathawk lak leh sawn lo turin LADC sorkar chu a hriattir bawh. Lawngtlai atanga thudawn danin a hma lam khan MNF MDC 12 leh Congress MDC neih chhun Pu C. Lalmuanthanga te chuan CEM atana ruat Pu C. Lalmuanthanga kaihhruai-in MDC 25 awmna LADC-ah hian nikum May ni 14 khan sorkarna an siam a. May ni 17 khan Council inkhawmah fiahna a paltlang a. ZPM chuan MDC 10 nei-in tun hnai khan BJP MDC awm chhun Pu T. Zakunga'n ZPM hi a zawm a. A hnu lawkah MNF MDC pahnih - CEM hlui Pu V. Zirsanga leh Pu Lallawmsanga Apeto te'n ZPM an thlawp leh tak bawh avangin ZPM hian thlawptu MDC 13 nei a inchhalin sorkarna siam an tum ta a ni.

Hemi hma hian LADC-ah hian rei tak sorkarna awm mumal thei lova a awm avangin thla khat leh a chanve zet chu larsap awpna hnuai (governor's rule)-ah awmin Lawngtlai district bawrhsapin larsap aiawhin sorkarna a keng a, chumi hnu-ah MNF leh Congress-in sorkar intawm an siam thei na a, kum 1 pawh a tlin hma-in paihthlak theih dinhmunah a ding leh ta a ni.

<><><>

SILENT PERIOD

Nilaini zing dar 7 atanga Village Council (VC) leh Local Council (LC) inthlan vote thlak tan a nih dawn avangin naktuk Thawhtanni tlai dar 4 atangin vote zawn khap a ni dawn.

State election commission atanga thudawn danin State Election Commission emaw District Election Officer (DEO)-te'n emaw phalna an pe a nih loh chuan, mi tumahin inthlan kaihnawih thil Television-ah emaw Print Media/Social Media-ah emaw mipui hmuh theih turin an phochhuak tur a ni lova. He thupek zawm lote chu kum hnih thleng lungin tantir emaw lei chawitir emaw, a pahniha hrem theih an ni.

Naktuk tlai dar 4 hma-in political party hrang hrangte chuan vote zawnga beihpui thlak an khar ang.

Mizorama district 9 (autonomous district council awmna tiam lo)-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih lai-in bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu mi 1,651 anawm bawk.

Aizawl Municipal Corporation (AMC) huam chhungah LC 87 awmin bial 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuhtu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm bawk a. LMC hnuaia LC te hi an inthlan hmasakna ber tur a ni.

<><><>

RENAL TRANSPLANT

Aizawl Civil Hospital-ah kal thlak (renal transplant) ti ve thei tura ruahman mek a nih thu Health & Family Welfare department hotute chuan an sawi.

Health department hotute chuan Mizo zingah kal thlak an tam thu sawiin phai lama kal thlak senso a tam em em a, hemi avang hian Mizoram sum tam tak phailamah a luang ral a ni an ti a. Hei hi tihlem a nih theihna atan Aizawl Civil Hospital-a kal thlak a nih ve theihna turin tanlak mek a ni, an ti. Hei bakah hian he damdawiina lung lam natna buaipuitu cardiology department chu DoNER ministry hnuaia a North east special infrastructure development scheme (NESIDS) sum hmanga thuam changtlun mek a nih thu an sawi a. NESIDS sum hmang tho hian Kolasib district hospital a khum 100 awm theihna tur bakah district thar pathum - Khawzawl, Saitual leh Hnahthial district a khum 50 theuh awm theihna tur district hospital sak hna pawh thawh tan a ni an ti.

Tun dinhmunah Directorate of hospital & medical education hnuaiah khum 1,057 awmna damdawiin a awm mek a Directorate of health services hnuaiah damdawiin khum 500 awmin Zoram Medical College & Hospital, Falkawn-ah khum 420 a awm bawk a. Mimal enkawl damdawiin ah 1,760 a awm bawk a ni.

<><><>

WAR AGAINST DRUGS

CYMA President Pu Lalhmachhuana chuan ruihhlo do turin YMA hruaitu, member, nu leh pa, Sorkar leh Kohhranho te thahnemngai taka pen chhuak tur leh ruihhlo do pui turin a sawm.

Central YMA buatsaih, Vanapa Hall-a Ruihhlo Do chungchanga infuihtharna hunah he thu hi sawiin, nasa zawka ruihhlo do tura hmalakna tur kawng hrang hrangte chuan a tarlang.

Pu Lalhmachhuana chuan ruihhlo do-a ke pen chhuak turin a bul tan thar leh na'n hruaituten ruahmanna an siam angin, sum neih ang ang atangin Aizawl YMA Branch zawng zawng-ah cheng 5,000 theuh ruihhlo do na'n pek a nih bakah, Sub Headquarters zawng zawng-ah Cheng Nuai 2 theuh a pe chhuak bawk a, direct-a a awp group-ah Cheng Sing 3 pek

chhuah a nih thu a sawi a, rawngbawlina tak tak rilru puin ram chhan na'n YMA member zawng zawng te, a thara ruihhlo do-a pen chhuak turin a sawm a ni.

Ruihhlo Do infuihtharna hun ah hian Aizawl khawpui chhunga YMA Branch 109 atangin Branch hruaitute leh Branch YMA hrang hrang a kumpuan Sub-Committee member 900 bawr vel an kal khawm a ni.

Kalkhawmte hian Central YMA leh NGO Coordination Committee in hmalakna kalpui mek pahnih ah Resolution an pawm bawk a. Mizoram rohlu, Lengpui Airport hi Indian Air Force (IAF) kutah hlan a nih lohna tura Central YMA leh NGO Coordination Committee in hma a lakna chu an thlawp thu leh IAF kuta Lengpui Airport hlan hi an rem ti lo a ni tih leh Aizawl khawpui laili a awm mek Assam Rifles -te chhuah hunah an awmna hmun, Lammual leh a chhehvel hi mipui vantlang tana tangkai taka hman a nih theih nan leh mimal, Pawl, Political Party leh Kohhran ten remchang la lo tura Central YMA hmalakna hi an thlawp thu leh theihtawp chhuaha hmalak zel tha an tih thu an puang a ni.

<><><>

ASSEMBLY

Tun thla ni 19 atanga tan tur Assembly inkhawm (budget session) atan tun thlengin sorkar atangin dan siam tura duan (bill) pahnih a lut tawh.

Assembly secretariat atanga thu dawn danin dan siam tura duan hi Labour, Employment, Skill Development & Entrepreneurship (LESDE) leh Urban development & Poverty Allevation (UD&PA) atangin pakhat ve ve a lut tawh a. Zawhna House chhunga chhan chi (starred question) 317 leh ziaka chhan chi (unstarred question) 35 a lut tawh bawk.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchintha puan leh a ni ang.

<><><>

DELHI CM HANDS OVER RESIGNATION

Delhi assembly inthlanpuia rorellai, Aam Aadmi Party (AAP) an chak loh hnuah Chief Minister, Atishi-in tukin khan Lt. Governor, VK Saxena hnenah banna a thehlut. Chief Minister a nihna atanga AAP Convenor Arvind Kejriwal-a a ban hnu nikum Sept thla khan Atishi hi Chief Minister atan lak luh a ni a, tun tum inthlanah khan a bial ngai, Kalkaji atangin thlan tlin leh a ni.

Hetih lai hian, Delhi LG Vinai Kumar Saxena chuan Delhi Legislative Assembly 7-na chu a thiat a, Prime Minister Narendra Modi-a zin haw hnu, tunkar chhovah hian BJP-in sorkar an siam theih thu, LG hnenah an thehluh rin a ni.

<><><>

CHHATISGARH ENCOUNTER

Chhattisgarh-a Maoist leh security force-te inbeihna thleng mekah Moist 31 an thi tawh a, security force mi 2 an thi tawh bawk.

Security force-te hian an thudawn bawhzuiin Bijapur Dist-a National Park ngawpui-ah dapchhuah beihpui an thlak a, tukin atang khan Maoist-te nen an inkap tan a ni. Maoist-te ruang hi hmuh kim a ni tawh a, silai leh a mu tam tham tak hmuhchhuah a ni bawk.

<><><>

PARIKSHA PE CHARCHA

Prime Minister Narendra Modi-a hova zirna chungchang sawihona, Pariksha Pe Charcha vawi 8-na chu naktuk hian New Delhi-a Bharat Mandapam-ah neih a ni dawn a, sawihonaa tel tur hian state leh Union Territory hrang hrang atangin zirlai 36 thlan chhuah an ni.

He prog hi Live-in Akashvani, Doordarshan, Swayam, Swayam Prabha leh PMO YouTube channel-ah te, Education & Information leh Broadcasting ministry social media channel-ah tihchhuah a ni ang.

<><><>